

# 《淨土十疑論》導讀

天台智者大師 造

## 甲一、捨離眾生疑

### 乙一、徵問

諸佛菩薩以大悲為業，若欲救度眾生，祇應願生三界，於五濁三塗中，救苦眾生，因何求生淨土？自安其身，捨離眾生，則是無大慈悲，專為自利，障菩提道！

### 乙二、釋疑

菩薩有二種，一者、久修行菩薩道，得無生忍者，實當所貴。二者、未得已還，及初發心凡夫。凡夫菩薩者，要須常不離佛，忍力成就，方堪處三界內，於惡世中，救苦眾生。

故《智度論》云：「具縛凡夫，有大悲心，願生惡世，救苦眾生者，無有是處。」何以故？惡世界，煩惱強，自無忍力，心隨境轉，聲色所縛。自墮三塗，焉能救眾生！假令得生人中，聖道難得，或因施戒修福，得生人中，得作國王、大臣，富貴自在。縱遇善知

識，不肯信用，貪迷放逸，廣造眾罪。乘此惡業，一入三塗，經無量劫，從地獄出，受貧賤身，若不逢善知識，還墮地獄。如此輪迴，至於今日，人人皆如是。此名難行道也。

凡夫無力，唯得專念阿彌陀佛，使成三昧，以業成故，臨終斂念得生，決定不疑。見彌陀佛，證無生忍已，還來三界，乘無生忍船，救苦眾生，廣施佛事，任意自在。

## 甲二、捨此求彼疑

### 乙一、徵問

諸法體空，本來無生，平等寂滅，今乃捨此求彼，生西方彌陀淨土，豈不乖理哉？

又經云：「若求淨土，先淨其心，心淨故即佛土淨。」此云何通？

### 乙二、釋疑

釋有二義，一者總答，二者別答。

總答者，汝若言：求生西方彌陀淨土，則是捨此求彼，不中理者，汝執住此，不求西方，則是捨彼著此，此還成病，不中理也。

二別答者，夫不生不滅者：於生緣中，諸法和合，不守自性，求於生體，亦不可得！此生生時，無所從來，故名不生；不滅者，諸法散時，不守自性，言我散滅，此散滅時，去無所至，故言不滅，非謂因緣生外，別有不生不滅，亦非不求生淨土，喚作無生。《維摩經》云：「雖知諸佛國，及與眾生空，而常修淨土，教化諸群生。」

諸佛說法，常依二諦，不壞假名，而說諸法實相。智者熾然求生淨土，達生體不可得，即是真無生，此謂心淨，故即佛土淨。愚者，為生所縛，聞生即作生解，聞無生即作無生解，不知生者即是無生，無生即是生。不達此理，橫相是非，嗔他求生淨土，幾許誤哉！此則是謗法罪人，邪見外道也！

### 甲三、偏念一佛疑

#### 乙一、徵問

十方諸佛，一切淨土，法性平等，功德亦等，行者普念一切功德，生一切淨土，今乃偏求一佛淨土，與平等性乖，云何生淨土？

#### 乙二、釋疑

一切諸佛土，實皆平等，但眾生根鈍，濁亂者多，若不專繫一心一境，三昧難成，專念阿彌陀佛，即是一相三昧，以心專至，得生彼國。

又求一佛功德，與一切佛功德無異，以同一佛法性故。為此念阿彌陀佛，即念一切佛，生一淨土，即生一切淨土。故《華嚴經》云：「一切諸佛身，即是一佛身，一心一智慧，力無畏亦然。」又云：「譬如淨滿月，普應一切水，影像雖無量，本月未曾二。如是無礙智，成就等正覺，應現一切刹，佛身無有二。」

智者以譬喻得解，智者若能達：一切月影即一月影，一月影即一切月影，月影無二。

故一佛即一切佛，一切佛即一佛，法身無二。故熾然念一佛時，即是念一切佛也。

#### 甲四、偏求一土疑

##### 乙一、徵問

等是念求生一佛淨土，何不十方佛土中，隨念一佛淨土，隨得往生，何須偏念彌陀佛耶？

##### 乙二、釋疑

凡夫無智，不敢自專，專用佛語，故能偏念阿彌陀佛。云何用佛語？釋迦大師一代說法，處處聖教，唯勸眾生，專心偏念阿彌陀佛，求生西方極樂世界，如《無量壽經》、《觀經》、《往生論》等，數十餘部經論文等，殷勤指授，勸生西方，故偏念也。

又彌陀佛別有大悲四十八願，接引眾生。又《觀經》云：「阿彌陀佛有八萬四千相，一一相有八萬四千好，一一好放八萬四千光明，遍照法界念佛眾生，攝取不捨。」若有念者，機感相應，決定得生。又《阿彌陀經》、《無量壽經》、《鼓音王陀羅尼經》等云：「釋迦佛說經時，皆有十方恆沙諸佛，舒其舌相，遍覆三千大千世界。」證成一切眾生念阿彌陀佛，乘佛大悲本願力故，決定得生極樂世界。

故知阿彌陀佛，與此世界極惡眾生，偏有因緣，其餘諸佛，一切淨土，雖一經兩經，略勸往生，不如彌陀佛國，處處經論，殷勤叮嚀，勸往生也。

## 甲五、具縛得生疑

### 乙一、徵問

具縛凡夫，惡業厚重，一切煩惱，一毫未斷，西方淨土，出過三界，具縛凡夫，云何得生？

## 乙二、釋疑

有二種緣，一者自力，二者他力。

自力者，此世界修道，實未得生淨土，是故《瓔珞經》云：「始從具縛凡夫，未識三寶，不知善惡因之與果，初發菩提心，以信為本，住在佛家，以戒為本。」受菩薩戒，身身相續，戒行不闕，經一劫、二劫、三劫，始至初發心住，如是修行十信、十波羅蜜等無量行願，相續無間，滿一萬劫，方始至第六正心住，若更增進，至第七不退住，即種性位，此約自力，卒未得生淨土。

他力者，若信阿彌陀佛大悲願力，攝取念佛眾生，即能發菩提心，行念佛三昧，厭離三界身，起行施戒修福，於一一行中，迴願生彼彌陀淨土，乘佛願力，機感相應，即得往生。

如人水路行，藉船力故，須臾即至千里，謂他力也。譬如劣夫，從轉輪王，一日一夜周行四天下，非是自力，轉輪王力也。

## 甲六、生彼不退疑

### 乙一、徵問

設令具縛凡夫，得生彼國，邪見三毒等常起，云何得生彼國，即得不退，超過三界？

### 乙二、釋疑

得生彼國，有五因緣不退，云何為五？

一者、阿彌陀佛大悲願力攝持，故得不退。

二者、佛光常照，故菩提心常增進不退。

三者、水鳥樹林，風聲樂響，皆說苦空，聞者常起念佛、念法、念僧之心，故不退。

四者、彼國純諸菩薩，以為良友，無惡緣境。外無神鬼魔邪，內無三毒等，煩惱畢竟不起，故不退。

五者、生彼國即壽命永劫，共菩薩佛齊等，故不退也。



## 甲七、易生彌勒疑

### 乙一、徵問

彌勒菩薩，一生補處，即得成佛，上品十善，得生彼處，見彌勒菩薩，隨從下生三會之中，自然而得聖果，何須求生西方淨土耶？

### 乙二、釋疑

求生兜率，亦曰聞道見佛，勢欲相似，若細比較，大有優劣，且論二種——

一者、縱持十善，恐不得生，何以得知？《彌勒上生經》云：「行眾三昧，深入正定。」方始得生，更無方便接引之義，不如阿彌陀佛本願力、光明力，但有念佛眾生，攝取不捨。

二者、兜率天宮是欲界，退位者多，無有水鳥樹林、風聲樂響，眾生聞者，悉念佛發菩提心，伏滅煩惱。又有女人，皆長諸天愛著五欲之心，又天女微妙，諸天耽玩，不能自勉。不如彌陀淨土，水鳥樹林、風聲樂響，眾生聞者，皆生念佛發菩提心，伏滅煩惱。

## 甲八、十念得生疑

### 乙一、徵問

眾生無始已來，造無量業，今生一形，不逢善知識，又復作一切罪業，無惡不造。云何臨終，十念成就，即得往生，出過三界，結業之事，云何可通？

### 乙二、釋疑

汝以無始已來，惡業為重，臨終十念為輕者，今以道理，三種校量，輕重不定，不在時節久近多少。云何為三：一者在心，二者在緣，三者在決定。

在心者：造罪之時，從自虛妄顛倒生；念佛者，從善知識，聞說阿彌陀佛真實功德名號生。

一虛一實，豈得相比。譬如萬年闇室，日光暫至，而闇頓滅。豈以久來之闇，不肯滅耶？

在緣者：造罪之時，從虛妄癡闇心，緣虛妄境界，顛倒生；念佛之心，從聞佛清淨真實功

德名號，緣無上菩提心生。一真一偽，豈得相比。譬如有人被毒箭中，箭深毒慘、

傷肌破骨，一聞滅除藥鼓，即箭出毒除。豈以箭深毒慘，而不肯出也？

在決定者：造罪之時，以有間心、有後心也；念佛之時，以無間心、無後心，遂即捨命，善心猛利，是以即生。譬如十圍之索，千夫不制，童子揮劍，須臾兩分。

### 甲九、路遠難到、根缺不生疑

#### 乙一、徵問

西方去此十萬億佛剎，凡夫劣弱，云何可到？又《往生論》云：「女人及根缺，二乘種不生。」既有此教，當知女人及以根缺者，必定不得往生！

#### 乙二、釋疑

##### 丙一、釋路遠難到

為對凡夫肉眼生死心量說耳，西方去此十萬億佛剎。但使眾生淨土業成者，臨終在定之心，即是淨土受生之心。動念即是生淨土時。為此《觀經》云：「彌陀佛國去此不遠。」又業力不可思議，一念即得生彼，不須愁遠。

又如人夢，身雖在床，而心意識，遍至他方一切世界，如平生不異也。生淨土亦爾，動念即至，不須疑也！

### 丙二、釋根缺等不生

女人及根缺、二乘種不生者，但論生彼國無女人，及無盲聾瘡啞人。不道此間女人，根缺人不得生。彼若如此說者，愚癡全不識經意。

### 丙三、結論

故《無量壽經》四十八願云：「設我得佛，十方世界一切女人，稱我名號，厭惡女身，捨命之後，更受女身者，不取正覺。」況生彼國，更受女身，根缺者亦爾。

## 甲十、如何修行疑

### 乙一、徵問

今欲決定求生西方，未知作何行業，以何為種子，得生彼國？又凡夫俗人皆有妻子，未知不斷姪欲，得生彼否？

## 乙二、釋疑

欲決定生西方者，具有二種行，定得生彼，一者、厭離行，二者、欣願行。

言厭離行者：凡夫無始已來，為五欲纏縛。輪迴五道，備受眾苦。不起心厭離五欲，未有出期。為此常觀此身膿、血、屎、尿，一切惡露、不淨、臭穢。故《涅槃經》云：「如是身城，愚癡羅刹止住其中。誰有智者，當樂此身。」又經云：「此身眾苦所集，一切皆不淨，扼縛癰瘡等，根本無義利。」又發願，願我永離三界，雜食臭穢，膿血不淨，耽荒五欲，男女等身；願得淨土法性生身，此謂厭離行。

二明欣願行者，復有二種：一者、先明求往生之意。二者、觀彼淨土莊嚴等事，欣心願求。

明往生意者：所以求生淨土，為欲救拔一切眾生苦故。即自思忖，我今無力，若在惡世，煩惱境強，自為業縛，淪溺三塗，動經劫數。如此輪轉，無始已來，未曾休息，何時能得救苦眾生。為此求生淨土，親近諸佛，若證無生忍，方能於惡世中，救苦眾生。故《往

生論》云：「言發菩提心者，正是願作佛心；願作佛心者，則是度眾生心；度眾生心者，則是攝眾生佛國心。」

二明欣心願求者：希心起想，緣彌陀佛，若法身、若報身等，金色光明，八萬四千相，一一相中八萬四千好，一一好放八萬四千光明。常照法界，攝取念佛眾生。

又觀彼淨土，七寶莊嚴妙樂等，備如《無量壽經》、《觀經》十六觀等。常行念佛三昧，及施戒修等一切善行，悉以迴施一切眾生，同生彼國，決定得生。此謂欣願門也。